



Fréttabréf 26.11.2020

VATNSENDASKÓLI

Óhætt er að segja að nóvember hafi verið sérstakur hvað skólann varðar. Vegna hertra sóttvarna í grunnskólum urðu nemendur í 5. – 10. árgöngum að bera grímur inni í kennslustofum því ekki var hægt að tryggja fjarlægðarmörk milli þeirra. Við lögðum áherslu á stöðugleika meðal nemenda og halda daglegri rútínu eins og kostur er. Nemendur stóðu sig frábærlega vel þó þetta hafi reynst mörgum þeirra erfitt. Ný reglugerð kom svo til framkvæmda upp úr miðjum nóvember og þá var fjarlægðarmörkum aflétt af nemendum í 5. – 7. árgöngum. Unglingarnir okkar þurfa enn að nota grímur en von er á nýjum reglum eftir helgina. Skipulag vegna elsta stigs ætti að berast ykkur eins fljótt og hægt er.

Búið er að setja upp eftirlitsmyndavélar við skólann og verða þær tengdar á næstu dögum. Ákveðnar reglur gilda um eftirlitsvélar og sendi ég ykkur tölvupóst með þeim í vikunni og er mikilvægt að allir kynni sér þessar reglur. Við erum einnig að vinna við að bæta lýsingu aftan við skólann.

Desember er handan við hornið með aðventu, ljósadýrð og spenningi fyrir jólonum. Leiðarljós okkar í Vatnsendaskóla er að skapa vellíðan og öryggi meðal nemenda, starfsmann og foreldra. Þessum mánuði fylgja ákveðnar hefðir og munum við eftir fremsta megni halda þeim þó fyrirkomulag þeirra breytist að einhverju leyti. Skreyingardagur verður á föstudaginn hjá nemendum í 1.- 7. árgöngum en 8. – 10. árgangar munu skreyta sín svæði föstudaginn 4. desember. Þann dag verður einnig jólaþeysudagur hjá öllum nemendum og starfsmönnum skólans. Jólakaffihúsið og jólamaturinn verða á sínum stað en við getum ekki skipulagt þessa viðburði endanlega fyrr en við vitum hvernig nýjar reglur verða. Jólaskemmtanir verða 18. desember og verður fyrirkomulag þeirra auglýst síðar.

Ein af hefðunum í desember eru jólasveinaleikarnir en þeir hafa sett svip sinn á skólann mörg undanfarin ár. Vegna Covid verðum við að fresta þeim því nemendum er blandað þvert á árganga. Við stefnum á að halda leikana fyrir páskafrí og vonumst til að staðan þá verði önnur, bóluefnið komið og nemendur megi blandast í hópum.

Að lokum óskum við ykkur góðrar aðventu og vonum að þið njótið hennar með nánustu fjölskyldu.

Bestu kveðjur frá okkur,

María Jónsdóttir, skólastjóri

Hrós mánaðarins:


Fá foreldrar, starfsmenn og nemendur Vatnsendaskóla fyrir að takast vel á við þær miklu breytingar sem hafa orðið á skólastarfi. Jákvæðni og samvinna er okkur mikilvæg. Vinnum saman að vellíðan allra nemenda.



Foreldrar á samfélagsmiðlum

Samfok hefur útbúið **siðareglur** fyrir foreldra varðandi Facebook hópa þar sem kemur m.a. fram að Facebook er ekki réttur vettvangur til að ræða persónuleg málefni barnanna eða gera upp vandamál sem geta myndast í barna- eða foreldrahópnum.

Hér eru reglurnar.



Góðgerðarsöfnun hefur verið eitt af okkar leiðarljósi í desember. Það að gefa af sér og að læra að margt smátt gerir eitt stórt hefur verið okkur mikilvægt. Í ár munum við safna fyrir Pieta Ísland. Meginmarkmið samtakanna er að vinna gegn sjálfsvígum og sjálfsskaða á Íslandi. Samtökin stuðla að forvörnum, opinni umræðu og vitundarvakningu um sjálfsvíg og sjálfsskaða. Upphaf stofnunar Pieta samtakanna má rekja til ársins 2013 þegar hópur áhugamanna um forvarnarstarf gegn sjálfsvígum og sjálfsskaða kom saman. Í þessum hópi voru m.a. einstaklingar sem höfðu kynnt sér starfsemi Pieta House á Írlandi og séð að slík starfsemi gæti hentað vel á Íslandi. Á vormánuðum 2016 var Pieta Ísland stofnað og farið að huga að formi og innihaldi starfseminnar. Á haustmánuðum var hugmyndin kynnt víða í samfélaginu og lögð drög að starfseminni.

Vorið 2017 var ráðinn framkvæmdastjóri í hálftr starf og formannaskipti urðu á svipuðum tíma, Björk Jónsdóttir tók við af Jóhönnu Maríu Eyjólfsdóttur. Til gamans má geta að Jóhanna María starfar einmitt í teymi á vegum grunnskóladeildar Kópavogsbæjar. Markmiðið teymisins er að aðstoða nemendur við að vera besta útgáfan af sjálfum sér og vinna með tilfinningar þeirra. Við minnum á að margt smátt gerir eitt stórt. Baukurinn er staðsettur á skrifstofu skólans frá 1. desember en aðalsöfnunarlíka er 7.-11. desember.

Áhugaverðar dagsetningar í nóvember og desember

27.11 Skreytingadagur í Vatnsendaskóla hjá 1.-7. árgöngum.

1.12 Fullveldisdagur Íslands

4.12. Jólapeysudagur hjá öllum og skreytingardagur hjá 8.-10. árgöngum

7.-11.12 Jólakaffihús hjá öllum árgöngum. Nánari upplýsingar berast síðar .

18.12 Jólaskemmtun hjá öllum

Spjaldtölvuvefur Kópavogsbæjar

Gagnlegar og mikilvægar upplýsingar eru að finna á **spjaldtölvuvefnum**.

Smelltu **hér til** að skoða vefinn.

Námsvefur Vatnsendaskóla

Inn á námsvef Vatnsendaskóla er að finna allar kennsluáætlanir. Smelltu **hér til** að skoða námsvefinn okkar.



Vatnsendaskóli er þátttakandi í alþjóðlegu samstarfi á vegum Erasmus+ sem er mennta- og styrkjaáætlun Evrópusambandsins. Tvö verkefni verða unnin næstu tvö til þrjú skólaár, 2020-2021, 2021-2022 og 2022-2023.

Fyrri verkefnið heitir *Eco thinking for Eco living*, það hófst 1. október 2019 og lýkur 30. september 2022. Verkefnið fjallar um umhverfið og loftlagsbreytingar í heiminum. Þátttökulönd eru: Litháen, Tyrkland, Frakkland, Spánn og Ísland. Verkefnið hófst síðastliðinn vetur en vegna Covid 19 þurfti að fresta heimsóknnum um stund. Verkefnið er fyrir nemendur 14-18 ára og kennara. Stefnt er á að fara í fyrstu heimsóknina í apríl 2021 með 4 nemendur og 2 kennara. Við verðum að sjá hvort það gangi upp vegna Covid 19 en horfum bjartsýn til betri tíma. Seinna verkefnið okkar heitir *The Final Countdown*, verkefnið hefst vonbráðar og stendur til 30. september 2023. Verkefnið fjallar einnig um umhverfið og loftlagsbreytingar í heiminum. Þátttökulönd eru Tyrkland, Grikkland, Spánn (Gand Canarí), Portúgal, Ítalía (Sikiley) og Ísland. Verkefnið er fyrir nemendur 13-15 ára og kennara. Fyrsta ferð verður farin haustið 2021 en þrjár af sex ferðum verða með nemendum. Bæði verkefni eru fyrir nemendur á elsta stigi. Spennandi tímar framundan hjá okkur í Vatnsendaskóla.